

庸  
庵  
文  
外  
編

庸庵文外編卷三

無錫薛福成叔耘

上曾侯相書

乙丑

太老夫子元侯中堂節下。竊惟天下之將治。必有大人者出而經緯之。而天之靳之。往往有二。宋明以來。大儒閒出。恆不得居將相之位。以有爲於時。得位矣。或限於地。或受任未專且久。或丁舉世耳目之因循而礙於更革。則亦稍稍補苴掇拾。而未暇爲百世深計。此非其人不偉。位不顯。而時爲之也。若夫天生瑰琦宏傑之人。而畀以至重之任。又有可因之時。則天以百世事業寄之。

也不待言而決矣。

國家承平餘二百年。自粵孽倡亂。荼毒徧海內。回苗幅  
捻諸寇。如蝟毛而起。節下以鄉兵數千。號召賢俊。爲天  
下倡。廓清南楚。奮兵而出。蕩鄂渚。摧江州。收奪失土數  
千里。遂受東征之

命。水陸諸軍。夾江而下。規全皖形勢之地。以制賊死命。  
推轂羣帥。選將分兵。則兩浙三吳。相次恢復。然後悉銳  
而拔金陵。梟元惡。掃除數百萬犴狴之豺虎。而滅其景  
跡。節下之勲。磊磊軒天地。海內抵掌高談之士。窺見標  
末。開口不能誦說萬一。拘方鄙儒。豈復能仰測高深。擬

議影響閒哉。抑福成竊不自揣。猶有望於節下者。語曰。行百里者半九十。節下戡亂之業。視唐之汾陽王。明之新建伯。殆已至百里而又過之。若必如伊傅周召之致治。則適及乎百里之半。而當加意之時也。伊傅周召固非福成所敢窺測。若三代下之能追蹤前哲者。莫如諸葛武侯。請設言武侯之事。假令當時滅吳盪魏。天下爲一。將爲一代建不拔之業。必作人才以培邦本也。審矣。必飭治道以康兆民也。審矣。必將策富强。定經制。消反側。防外侮。正風俗。又無疑矣。武侯雖不得行其志。而其志之所當爲者。則可推也。卽推而上之。爲伊傅周召。其

所爲亦當如是也。今節下之功，旣遠出武侯上，而可爲之時，又十倍武侯。

天子倚之，天下信之。節下建一議，行一政，則舉世將視爲轉移。又值變亂之後，百事興革，民心望治，往往更張而不見其迹。施設而易蒙其澤，是伊傅周召所僅能一遇之時。而又知節下平日所自期，斷不在伊傅周召下。故福成敢以其迂疏之說進焉。福成於學人中，志意最劣下，往在十二三歲時，強寇竊發嶺外，慨然欲爲經世實學，以備

國家一日之用，乃屏棄一切而專力於是。始考之二千

年成敗興壞之局用兵戰陣變化曲折之機旁及天文陰陽奇門卜筮之崖略九州阨塞山川險要之統紀靡不切究蓋窮其說者數年而覺要領所在初不止此因推本姚江王氏之學以收斂身心爲主然後浩然若有得也既又知爲學之功居敬窮理不可偏廢而溯其源不出六經四子之說蓋術凡三變而確然得所歸宿處所懼知識構昧師心獨學於窮鄉之中固陋不足以應世竊自私念必得今世巨公如節下者以爲依歸而磨礪以事始能略有成就昔先人以文辭受知門下爲縣令湖南方稍欲建樹不幸中道卽世福成時隨長兄福

辰在楚。適節下辱垂弔。賻恩誼之隆。非可言喻。旣而賊陷故鄉。奔馳東歸。省母相遇於江北之寶應。遂僑僻處居之。讀書奉親之外。妄畫滅賊方略。思欲親詣行轅。陳獻輒以母老家貧。不能遠行而罷。邇者節下犁平醜類。而天下至急至切之務。與東南經久之規模。均惟節下是賴。蓋所謂其人其任其時。三者咸會其極者。失此不言。復誰與言之。今聞節下以剿擒寇北上。彼皆烏合。救死之寇。以節下之威臨之。自當不日蕩定。但所云百世事業。不盡在此。故輒獻其前所欲云者。其北方利病。與剿捕機宜。數千里外。未敢懸度。至其梗概。略具於治擒。

寇一篇。謹撮大端。列爲條目如左。曰養人才。廣墾田。興屯政。治捻寇。澄吏治。厚民生。籌海防。挽時變。雖其間草野臆度之言。不乏而論當今要務。似不外是。言辭蕪拙。字跡麤劣。伏惟恕而察之。不勝惶悚冒昧之至。門下晚學生薛福成再拜謹上。

### 養人才

古之取士者。或以德進。或以事舉。或以言揚。三者兼用。而不偏廢。隋唐以降。始專尙考試。然其閒自巖穴顯者。猶或有之。又特設制科。以待非常之士。明初至今。制藝日重。得人之塗。一歸之甲乙科。其初文風渾樸。期於明



理而止。故凡名賢碩德。與偉才異能之思。自表見於時者。亦往往由之以進。然自是不就考試之人。以事舉者。固屬寥寥。以德進者。更闐然無聞矣。近十數年來。潢池不靖。

朝廷博求賢才。大臣舉薦。率不次擢用。於是智略輻湊。虎臣輩出。四方瓌俊。雷動雲合。以贊中興之運。是豈無術以致之哉。蓋由

朝廷能破千載之成格。而節下以忠孝文武爲之倡。又復虛懷宏獎。振古罕有。故一代人才。聞而興起。用以截亂夷難。而惟節下之左右之也。今巨孽已平。海內漸以

無事英儁無由自效。士之奮迅求試者，復相率而入於科舉。科舉行之既久，其法不能無敝。蓋學士大夫以制藝相切劘，餘五百年。至於今，陳文委積，勦說相仍，而真意漸汨。取士者束以程式，工拙不甚相遠。夫以工拙不甚相遠之文，取決於有司，一時之愛憎，加以貪常嗜瑣，意見各異，而黜陟益以難憑。遂使世之慕速化者，置經史實學於不問，競務爲撓竊浮沍之習，以弋科第。魁碩之儒，皓首而不遇者，比比是也。然則欲救科舉之敝而收遺逸養人才，莫如徵辟與科舉並用。大凡以今日天下人才計之，其見收於科第者十之二，其見收於軍營

及一切保舉者十之三其沈抑迤邐而不獲一用者猶十之五節下誠博訪而慎擇之若德行純懿若經術精深若吏治明嫻若邱園高蹈若練習名法若諳曉韜鈴若幹略過人若文章希古其他茂才異等有一長一藝堪施實用者不拘一格取其見聞所及或素有時望者薦之朝復奏之

天子飭內外大臣各舉所知仿

國初舉博學鴻詞例召試

大廷量才錄用然後著爲成法不時舉行如是則賢才無遺逸之患可以輔科舉所不及而前此空疏之弊亦

且漸以轉移。夫科舉雖敝。其法固難變革也。若但云振文風。新士習。又非一人所能主其權。一日所能蔽其功也。節下負知人之雅鑒。昨者凶暨千紀。旣以之收召英豪。奏不世之奇功矣。今復爲

國家扶植元氣。以振聳天下人之耳目。當必有度越千古者。蓋斯事體大。非節下之德之力。不能成此舉。亦無復有能勝此舉者矣。伏惟及時加意焉。平居所作選舉論二篇。謹埶上。

廣墾田

江南衍沃稱天下。頃更喪亂。民死者不可勝數。其顛沛

飢羸僅存之民。或無以爲耕。耕亦不穫。然則事勢至此。雖天時大和。災祲不作。而甘雨下注。常委爲滄海之波。民固且拱手待盡於溝壑之間。而莫之拯也。時事之可憂。孰甚於此。雖然。福成竊觀古人之良法美意。垂爲百世之利者。往往轉出於喪亂之餘。今沃野千里。曠棄不耕。誠因此時修明開墾之政。則所謂百世之利。可得而建也。開墾之政有二。曰民墾。民之有業而無力者。借以籽種牛具資之耕。其曠絕無人之處。宜益募他州之人。願耕者。不計多寡。三年以後升科。給爲永業。則亦可以少充國賦。曰官墾。籍無主之田。官自募民耕之。定其租。

視民間租歲減什一二數歲之後當有成緒且近世官吏仰食縣官縣官所費不訾而受者常病其薄宜仿古祿田之法以公田給州縣代其俸廉大縣以千五百畝爲則小縣減三之一大率銀萬兩可墾田五千畝明歲俾自耕以其租易耕他處三歲可得萬五千畝若以十萬金爲之則得十五萬畝是百縣令之食也若以二十萬金爲之則祭祀役食等項地方之費歲省大半每行省籌二十萬金覈之經費不爲多而百世之利建焉夫自古公田之法往往不數十年而敝者以官爲經理不若民之自爲經理也今以之代俸廉及充州縣公費則

州縣之重之。必不後於民之自爲經理也。節下哀憐百姓。招流亡。給籽種。一切條法。簡而易行。若福成之愚。豈能贊一辭哉。然而經費不足。是以開之不廣。請卽見聞所及。就其一二言之。似亦有宜加之意者。今蘇常松太各屬。每縣各有善後局。局數十百人。平居皆習爲姦利。至無行義之輩。其中或有稍公正者。上官使主其事。亦以鄉黨親故。莫能相禁。以故歲糜鉅萬。報銷於上官。不啻以一爲五。道路嗟歎。以爲不如其已。由此觀之。孰若悉罷此輩。以節浮費。而濟事實哉。去歲不登。蘇松差愈常屬。惟錫金下種較多耳。然畝收僅數斗。田捐之令。畝

四百差役費二百民不得食而州縣苛督甚於錢漕不知有以聞節下否且錢六百固一二畝種麥資也麥熟後資以種稻亦一二畝今獨以錫金言之田捐爲五十萬畝則其所失豈可量哉伏惟推此類汰去之則官民並墾之利庶可得而議焉

興屯政

自巨猾倡亂以來當事者練兵募勇奚翅數十百萬其轉輸之費籌濟之勞幾於無孔不入雖傾天下之力以供之猶岌岌乎有不繼之勢賴節下威力數年之閒賊巢盡傾兇渠授首而前日調集之兵勇得以稍稍撤散



然就今之大勢計之。殘寇猶竊餘生。反側時多未靖。則有不可盡撤之勢。孤子者既無家可歸。驍健者或挺而生變。又有不能盡散之情。若聚而使之坐食。則長驕惰而滋事端。固非

國家之利。况十餘年閒。民力已竭。幸而稍獲休息。豈能復用其力以給軍食於無事之時。然則處今日而欲爲善全之策。不傷財。不累民。不弛備。并以開數百年富強之業者。蓋非講明屯政不可。夫屯政之有利無弊。自古然矣。三代井田之法廢。惟唐府兵得寓兵於農。遺意府兵壞而天下始有養兵之費。後惟明之衛所頗合於唐

之府兵人各授田二十畝納租六石使之且耕且守法至良也。洎乎中葉邊將得請官田自便且訓練不明僅責以納租而止。於是有軍之名無軍之實而軍衛之法壞。今東南數省戶口耗損大半往往有田多人少之虞勢必不能偏墾爲今之計宜籍各省民田之無主者官爲開墾籍各省未散之勇丁其願受田者每丁給田數十畝官爲相其便宜理其經界開其水利給其牛種三年之後每歲納租數石授爲永業俟經費有餘往往創築城堡倣明衛所之制爲設守備千總以訓練之三時務農一時講武每省特設一屯田總兵而統轄於提督

如此則江淮數千里要害之地。布置聯絡。隱然有指臂之勢。一旦有警。人人各自爲守。無復嚮者潰逃。故習行之有效。則推之而閩浙。而湖廣。而山東河南。莫不循是行之。此制一定。國無轉運之費。而驟獲勝兵。民無供給之勞。而藉資扞禦。營伍不以屯聚而滋他釁。地方不以備弱而召他虞。又以位世此無業之勇丁。而爲天下多墾數十百萬之田。則每歲增天下之穀。無慮數十百萬石。所入之租。兼足以贍國用。

國家數百年富強之業。實基於此。至其經費之所出。則暫借釐金一歲。於以措理而有餘。方今兵事漸戢。而釐

金未遽停者。正以勇丁未能盡取也。誠假一歲所入。以爲斯民建不世之利。一歲之後。勇丁各業其業。而釐金可以漸裁。此乃兩得之術。卽明告四方而行之。奚不可者。或曰。今之勇丁。習於酣豢。儻募之而不應。則奈何。曰。凡事之集。難乎其始。是在勸其爲倡者而已。勸之奈何。凡勇丁之始應募者。其授之田。必肥以廣。給之資與耜種。必厚以倍。俾勇丁慕耕種之利。勢將奔走而歸之。萬一勇丁應募者少。則相機漸散勇丁。而別募游民以授田。暇則以兵法部勒之。何患屯田之不廣歟。雖然。天下事莫亟於人才。更願於道府州縣中。無論在任候補。令

各條陳屯務利病取其言之洞中窾要斟酌時宜者召之面詢得失擇其才可用者委以綜理屯務又於行事之際察其能否而專其責成則異才必出而實政可興矣

治捻寇

自來制寇之術在任將而治捻之道在任吏昔日之治捻宜先任吏而後任將當今之治捻宜先任將而後任吏方捻寇之初起也不過饑窮烏合之徒所至遮略剽殺過城寨不攻遇大軍則走斯時得一驍將屬以勁兵雖數十百萬之眾立可摧散然今日散爲民明日復起

爲擒矣。卽擊其衆而盡滅之。而深惡民之弄兵者。復接踵以起。蓋擒寇之難治在此。此其故何哉。山東河南數省吏治疲沓已久。民貧俗悍。習於爲非。善撫之則皆民也。不善撫之則皆擒也。故絕擒之源。首在吏治。昔龔遂守渤海而莠民復業。張陵守廣陵而劇盜乞降。

本朝乾隆季年。黔楚苗匪蠢動。福文襄王以天下全力臨之。迄於無功。以沒傅鼐一同知耳。用鵬勦之法。卒以平苗。此其已事可見。故曰先任吏而後成將。今之治擒也。則不然。凡兇頑狡悍之民。獮薶略盡。其漏網捕竄者。不過一二桀黠之徒。爲之渠率。誑誘驅脇。以與王師選。

不幸使之一再得志。焱忽慄慄。幾類流寇。語曰。涓涓不塞。將爲江河。今已不啻涓涓矣。然及今治之。猶可圖也。圖之之機。宜檄直隸山東河南督撫。堅壁清野。謹守封略。各以其兵策應。節下以大軍蹙之。分遣諸將。或截擊。或迎擊。或斷其道。或搗其堅。或襲其輜重。或披其形勢。或攻其無備。或散其脅從。彼一二兇渠之首。旦夕可致麾下。復責各省之吏。捕餘孽。安反側。撫創痍。則擒寇之蹤跡。一舉蕩盡。然後澄清吏治。永杜復起之漸。故曰。先任將而後任吏。雖然。論今之所以平捻者。豈更無當務之策乎哉。福成蓋嘗遙揣事機。而略舉其要。則有四。一

曰汰冗營。夫捻所以旋滅旋熾者。豈不以大軍乏犄角之援。各路鮮堵截之兵乎。兵少援絕。而邸帥以孤軍疲於奔命。豈不以冗營爲之累乎。何則。北方之號能戰者。張曜陳國瑞二人耳。其他屯戍諸軍。支餉非不廣也。覈其額。則十人不能三數人。又未必可用。委員以數百計。類多歌呼飲博以待獎敘。其保舉之優。薪水之費。倍於他處。故凡遊河南者。率視爲牟榮利之捷徑。數年以來。未見其能殺一賊。克一寨也。今欲汰此諸軍。當自汰冗員。清浮額始。誠節此諸軍之餉。可益精兵一二萬。復選健將部勒之。則大軍多犄角之助。各路奏堵截之效矣。



一曰用鐵騎。嘗聞賊所憚者。在南有水師。在北惟鐵騎。此實地勢使然。曩者大軍在光固閒。因山谷沮澤。礙於馳騁。以致失利。今賊已離其巢穴。而突齊魯豫燕之境。此皆平原曠野。非衝逐不爲功。宜廣調勁騎。每與賊遇。縱騎蹂之。賊雖衆。可殲也。或曰。然則賊避我而入山谷。沮澤則奈何。曰。以騎兵列守要道。勿與之戰。數月以後。彼食將盡。於是廣設方略。誘其支黨。俟其稍懈。則步兵蹈瑕而入。窮搗其巢。而以騎兵擒斬其逋竄者。此必勝之術也。一曰離逆黨。今聞賊渠悍者。併力拒我。故其勢強。然彼非有骨肉之親也。非能一心協力而永無猜貳。

也。誠宜察賊渠之可降者。遣閒招之。非誠納其降也。特使內相疑忌。腹心自潰。然後勢分力弱。而不至爲大患。否則恐其中有雄桀者。一旦魁其曹而併其眾。將不可復制矣。一曰招降附。夫賊中渠魁皆必死之寇。固決不肯就降。

國家亦決無赦之之理。赦之亦必爲變。若其餘固脅從耳。詿誤耳。急之則爲賊死。赦之則可以散其黨而孤其勢。此易見者也。且招降之所以不易言者。懲其詐也。懲其降而復叛也。詐不詐。明者能辨之。其詐也。暫羈縻之。乘其懈擊之。雖殲之可也。其非詐也。則固納之矣。猶慮

其叛也。歸其老弱。籍其強壯者。分隸各營。以古者以一隸五之法治之。其不從也。廉得其爲首者。誅之可也。此所謂以勦爲體。而以勦撫互施爲用者也。昔王陽明先平江西賊。或先使人招撫。俟其往來猶豫。爭論不決之間。乘閒急擊。或令人說其酋長。詣營。至則徑置之獄。而興兵擊滅其巢。功甚神速。而又不留餘患。今之以撫爲勦。亦當如是而已。凡此四者。皆福成遙爲臆度之辭。又所居僻遠。傳聞未必實。恐今事勢已有變更者。福成姑就數月前之聞見。略道其梗概如此。伏惟採擇而用之。幸甚。

澄吏治

欲舉天下創殘疲敝之民而致之休和。曷先乎。曰。先之州縣。今州縣有大弊二。曰捐班廣也。門丁橫也。有大要一。曰考課行也。二弊不去。一要不審。雖伊葛不治。今之由捐例進者。推其本意。不過以官爲市而已。夫至以官爲市。則剝民以自奉。損國以肥己。固其所也。若曰姑試之職。待其有過。大吏按劾而罷之。是以土地人民爲墨吏嘗試之具也。縱使旋用旋汰。而官終不得其人。其弊也。與無官等。今之病之者。不得已而用考試以困之。又非正本清源之道也。彼以捐進。庸陋固非其咎。若納其

貲而考黜之。是欺天下以罔利也。考而仍用。謀國之道。不當用此具文也。是故與其考之於後。不若停之於前。或曰。然則當如國用不足何。曰。國用之足不足。不在捐例之行不行。而在制用者之權其出入。且今之捐例益廣。而國用益虧者。何也。天下多一貪污之吏。卽多無窮失業之民。以致嘯聚而爲變。比其剪除。而糜餉已鉅萬矣。又或虧損公項。動以萬計。逾其所捐數倍。各省試用之員。往往人浮於缺。大吏曲爲調劑。輒授以無足重輕之事。其薪水之費。固已不貲。然則捐例雖若於國用有濟。實乃贏於此而絀於彼耳。稽之治道。旣如彼。籌之國

計又如此。是又何苦而不罷之哉。伏望奏減捐例。以爲停捐之漸。權定限制。捐雜職。許實任。捐正印。止虛銜。雜職中能稱職者。亦許隨例升轉。其前已捐而在官者。亦嚴爲考察。而去留之一二年後。軍務稍平。度支稍足。然後決然停止。若其濟國用之方。又在制祿田。以代俸廉。每歲節俸廉。以供縣官。計其所贏。當不減捐例所得。其說固略具於開墾之篇矣。或謂今之正途。大抵不曉世務。而操守不愈於捐班。甚或一莅職任。亦有以受賕聞者。曰。是則然矣。前論徵辟與科舉並行。蓋欲以振興人才。轉移士習。未嘗無以救正途之敝也。安得以正途之

敝遂謂捐班不當止哉。若夫門丁之設尤爲州縣巨蠹。今州縣官一莅任則僮僕什伯爲羣無不綸衣甘食肆爲姦偷其舉財賦獄訟而悉歸之者名曰門丁自丞尉雜職皆仰鼻息而食把持誕謾玩其官於股掌之上官或之死不悟或自慰曰彼權固重於我雖智者無如何也噫是猶布荆棘於門張網羅於要道而私憂其出入之不便我也試問羅網荆棘誰設之哉推其設此大端有二其媮者不事事則舉官事盡委之可以安而尸厥職其尤不肖者倚爲姦利外使張其爪牙而肉實與爲首尾一旦發露則託門丁爲解而已可以免於戾積習

相循末流益甚。雖稍有智識者。亦狃於俗例而不敢廢。且每赴一缺。則上官之薦紛然四至。彼屬吏安敢不遵。今胡不取各省之案牘閱之。凡州縣被民控愬者。大率多以門丁爲辭。則其橫可得而知也。宜嚴禁兩司以下。毋得以門丁爲薦。州縣毋得輒用。用而被控者。該丁以法論。官罷黜。著爲令。又嘗論之。漢郡縣得自辟曹掾。一時文學才俊之士。皆出其中。故能相倚如左右手。今更之以書吏。吏習猾。官孤益無恃。似宜漸復古制。令州縣得辟士之賢者爲吏。優其禮而以次升諸朝。卽不能爲此。宜且仿古三老孝弟之制。鄉舉其賢能。以賓禮禮之。



使爲教化之倡而任以保甲之事則推租捕盜之吏可以不至鄉里張官置吏所以爲民又安取此闢茸委瑣之輩與之共天下哉二弊旣去乃嚴考課考課之行於州縣始在慎其選繼在養其廉究在盡其才三者備而後考課之法不勞而立今州縣選補吏部拘之以資格大府私之以愛憎不能爲地擇人久矣輒美巧滑工於趨避者則舉世以爲明白公事其翹然名能吏通省不一二數者雖凡事勤敏往往可觀至於利源所在征取無藝亦不後於他人尙安望其撫循民瘼變化風俗哉今宜先擇悃悃無華有實心及民者畀之縣有幹略者

次之。然其要在兩司得人。兩司得人。則州縣得人矣。雖然。州縣之俸廉。大者無過千兩。而所謂雜款陋規。及幕友修脯。與一切辦公費。奚翅倍蓰。如是而欲其不妄取於民。不可得也。州縣無清廉之操。而欲其公且愼。明且勤。不可得也。方今之務。莫如嚴飭司道以下。革陋規。除雜派。限幕友修脯之制。其辦公費。令各縣籌經費之羨。漸置公田。俾長民者。不拮据於財用。而州縣始有清廉之吏。然尤不可不盡其才也。今郡守權不敵漢縣令。縣令權不敵漢戶賊曹。縣令自笞杖以上。不能專決。動須關白上官。其究也。上下以空文相束。雖賢者亦奉法救

過之不贍而不肖者反得以容其弊。又或以燕齊之人仕滇黔。甌閩之人仕秦隴。語言不諧。土風人情不悉。子身萬里之外。歎息而思歸。甚者疾病攻之。尙安望其能修職業哉。比其稍習而安之。則遷調而去矣。候補之員。委署一缺。常者一年。暫者數月。又有權缺之肥瘠。不時更代。雖授實缺者。留不遣。而故使無缺者代之。名爲調劑。授受之際。交代糾結難清。黠吏因緣舞弊。官知任事之不久。往往於數月中。肆爲掊克。以蓄數歲代缺之費。上下苟媮。豈不甚哉。今欲整飭吏治。莫如盡州縣之才。欲盡州縣之才。則必重其職任。滌去煩文。務持大體。又

爲奏明定例。凡五品以下任外任者。越省無過三千里。任實缺者。尙無大故。必滿任。試川之員。非稔其才。勿遣。遣之而能舉其職。勿遽撤。如是始可以盡其才矣。慎其選。養其廉。盡其才。三者無一闕。然後舉。當今要務。責之任其所爲。而徐考其成。卓異者。不次優擢。以風厲之。且宜倣有明及。

國初舊制。內轉爲御史及部曹。其鬪茸贓污者。懲之勿貸。考課之行於州縣者。如此。而又無捐班以參之。門丁以蔽之。則賢才孰不勸。不肖孰不誠。吏治蒸蒸。百廢具舉。凡所以復創痍爲富庶。化彫敝爲敦樸者。不外是矣。

厚民生

國朝兵制自京都滿蒙漢八旗及各行省要地屯駐旗營之外則有綠營分隸督撫河漕及水陸提鎮各標爲額至六十餘萬人約支俸餉二千萬兩去天下歲入之半遷流既久積習益深乾隆以後日形窳敝雖疊降明旨飭所司實力整頓而地廣勢散頗難著效嘉慶年間蕩平教匪已大半仗川勇之力咸豐初年粵寇披猖所至無不摧靡節下深鑒綠營之不足恃於是倡募鄉勇以臧元敬氏束伍法部勒之久之皆精練無敵各行省亦漸仿效之而湖南勇營之旌旗幾徧海內最後傳

其規制別募淮勇而淮軍復實用此誅鋤羣孽轉危爲安。然十餘年來用饟無算所以能撐持全局彌縫闕乏者則東南數省抽收百貨釐金之功也。向使舍此一孔其何以饋數十萬嗷嗷待食之軍而遏方張之寇。然則天下當有事之時國計之不能不藉資於釐金者勢也。雖然昔之創爲此法不過濟變一時而已。若軍事稍紓循是不革非所以厚民生而培元氣也。今巨患削平跳梁之寇非復前日比似可斟酌盈虛先減釐金漸減漸少以至於盡裁。漸以濯瘼噓枯稍蘇民困。夫釐金每百分而取其一征諸商者似不爲多。然以福成所親見

者論之卽如江北淮揚等處自江甯藩司所設釐局外有漕捐河捐撫捐糧臺捐及清淮籌防各府籌防各縣鎮團練之捐收數混殺各目詭寄三四百里閒卡局不下數十是殆征其十之二也而吏役之勒捐司事之需索不與焉彼爲商者工於牟利則仍昂其價於貨物而小民之生計日艱且今日之能倚釐金爲巨饌者以前日未始有釐金也若上下旣視爲定額則將有必不可少之經費待之以濟加以官吏侵蝕其中法久弊生此法卽爲徒設一旦復有猝然意外之變將籌何款以應之故減之裁之所以爲異日緩急計也然今之所以決

不能裁者何也。閩粵殘寇，尙未殄滅，兼以羣捻縱橫，苗回煽亂，凡諸勇營之得力者，方且徵調四出，奔命不遑。是餽項有不可減之勢，卽釐金有不能裁之勢，卽使諸寇漸平，而彈壓土匪，鎮守邊陲，亦非勇營不可。然則釐金終不能去乎？竊謂勇營之所以不能撤者，以綠營之不足恃也。綠營不足恃，而兵額仍未稍減，坐糜二千萬金之歲餉，病民病國，莫此爲甚。乃計臣樞臣，未嘗籌及置吏言官，未有論列者，則或率於舊制，不可改之說，或嘗於中外之利弊也，節下拳拳於愛民憂國，旣已洞晰其原矣，似宜於此時建議，普減天下綠營十分之四，可



省歲餉八百萬金以養勇營即可先減天下釐金十分之六蓋各省要害之地既有得力勇營填紮疲弱之兵不妨汰遣所留六成以供守汛護餉解犯之用可敷分布汰兵如有可用或撥歸屯田或招入勇營亦尙不至窮餓一轉移閒而國用不耗商民不困蓋食之者寡則用之者舒大學生財之大道易之所謂以美利利天下書之所謂利用厚生不外是也抑或別有遠圖必暫假釐金爲區畫此乃與福成屯田之議相合然當明定限制布告四方以一年二年爲度截然不稍延緩始無流弊夫用釐金以興屯政數年之後屯田畢理兵餉大減

而釐金固可盡裁也。興一利除一弊。二者交相爲用。又在斷而行之耳。

### 籌海防

方今中外之勢。古今之變局也。推其所以啟之者。有天生事。有人事。古者九州之內。各殊土而異宜。有隔數百里。不相通者。然而天地之風氣。日久漸開。山川之徑塗。習行則便。自秦一天下。至漢而收滇粵。置河西。至唐而通回紇。定天竺。至元而服俄羅斯。取西域。恢拓可謂極廣。寢尋迄於今日。西洋諸國。航海通商。凡歐羅巴亞墨利加數十國之人。頡頏並至乎中國。而以英吉利俄羅斯。

佛蘭西米利堅四國爲最強於是地球幾無不通之國是其所以然者天也非人之所能爲也西人之始至也非敢睥睨中國也曩者禁煙之役旣以發之驟而啟釁釁作矣彼猶懼天威之不測未敢狡焉以逞也忽而罷兵弛禁且償其貨以驕之繼而倏戰倏和茫無成議以致戰則喪師和則辱國於是中國之情實厯厯在西人之目索地索幣之師紛然狎至而粵寇乘之以起洎乎庚申之歲遂敢合從內向直犯

京師旣不獲已而講解以罷而中外之大防裂矣是其所以然者人也不可盡委之天也居今之世事之在天

者宜有術以處之。然後不爲氣數所窮。事之在人者。必有術以挽之。然後不爲鄰敵所侮。竊嘗默審乎天時人事之交。其道歷久不做者。要在知和之不可常恃。一日勿弛其防而已。防之之策。有體有用。言其體。則必修政刑厚風俗。植賢才。變舊法。祛積弊。養民練兵。通商惠工。俾中興之治業。蒸蒸日上。彼自俯首帖耳。罔敢恃叫呶之故態。以螫我中國。言其用。則籌之不可不豫也。籌之豫而確有成效可睹者。莫如奪其所長。而乘其所短。西人所恃。其長有二。一則火器猛利也。一則輪船飛駛也。我之將士。聞是二者。輒有談虎色變之懼。數十年來。瞠

目束手甘受強敵之侵陵而不能禦不知西人貪利彼之利器可購而得也西人好自炫所長彼之技藝可學而能也爲今之計宜籌專款廣設巨廠多購西洋製器之器聘西人爲教習遴募巧匠精習製造槍礮之法特選勁隊勤演施放槍礮之法又仿俄人國子監讀書之例招後生之敏慧者俾適各國習其語言文字攷其學問機器其傑出者旌以爵賞兼仿造火輪船數十艘平居則以運漕移衛所各官及漕標之兵以隸之旣以護運漕糧實以練習海道暇則兼操戰法若是則彼之所長我皆奪而用之矣世之議者或憤中國積弱以效法

西人爲恥不知工之巧器之良乃造化日闢之靈機非西人所得而私也夫巫臣教吳以弱楚國武靈胡服而滅中山安知中國人之才力不能駕而上之乎若夫乘彼所短則有合併之說有分離之說有牽制之說何謂合併曩者彼聚而攻我分而守我防粵則彼攻閩我備浙則彼擾滬比援師調集而彼又直指天津矣此中國所以憊也熾千斤之炭於通衢人皆望而畏之分爲千百處則一熄而無餘燄苟扼其要則每省所注意者不過一二口又恐其力不厚則以福建益廣東以浙江益江蘇以奉天山東益直隸一切兵權餉權用人之權皆

界之督師大臣彼數萬里遠來兵不眾而糧不繼一不得勢則心孤而氣餒矣此分者合之之效也何謂分離夫英法俄美四國勢均力敵其先皆有仇隙非能始終輯睦也昔英吉利之初發難也俄有可聯之勢美有效順之情中國非但漠焉置之抑且驅之激之使協以謀我聞英人之攻廣州強搜法美二國迫入大沽則俄法美三國皆從三國非有大憾於我也蓋知我之無可助而實可侮也誠能於發難之始察諸國之無惡意者先啗以微利而退之或竟密與聯結俾爲我助如是庶足披敵之黨屆時必有顯爲排解者有隱爲阻止者此合

者離之之效也。何謂牽制？今各國來者日益多，則各口之商務日益盛。倘一國有釁，則告各國以商務停止，當由啟釁之國償其利。又如英國有釁，則先以貿易之停止，諭其商民。法國有釁，則先以教民之不能安居中國，諭其教民。彼商民教民必不願也。而我仍默示懷柔，動其慕戀。如此則歸曲於敵，使之彼此怨尤，上下乖迕，其勢不順而謀必敗。此以各國牽制一國，以商民教民牽制彼國之效也。夫既奪其所長，又乘其所短，二者雖未足以盡海防之至計，而所可豫籌者，要不離乎此。若夫伐謀伐交之策，練兵練將之方，其措注於臨事者，本無



定形又非可豫爲揣度矣。

挽時變

自泰西諸國立約以來大抵於中國有利有害利則通有無以裕稅餉得利器以勦強寇此中國之大益也害則洋煙不禁漸染日廣傳教通行許其保護此中國之大損也竊嘗較其輕重要其始終則所謂益者什一二損者什八九其利害之不能相抵也明甚蓋洋煙盛則撓我養民之權洋教行則撓我教民之權教養無所施而國不可爲國矣此時局之變之尤可憂者也雖然和約一定往往數十年不改自非國勢日張事機絕順無

從輕議更張。居今日而論洋煙洋教。苟不知時變而嚴絕之勢所格也。若默揆時變而善挽之事所急也。今天下自衣冠至於負販。見困於洋煙者。不啻五人而一是。舉天下之人而廢其五之一也。而民之趨之者。尙無窮期。一染其癮。終身難去。且嗜之者亦自不願去。洋人布此鴆毒於中國。弱人精力。蝕人神志。其害過於洪水猛獸遠甚。然而持不禁之說者。曰恐擾民也。挑釁也。不知嚴禁吾民。乃中國自主之權。不必如曩者焚煙之舉也。法寬而簡則易行。不必如曩者斬決之罪也。治其源者。在絕中國人之嗜。嗜之無人。彼之煙自無所售。而來者

益寡矣。且今中國之嗜洋煙者，非其性之本然，其弊在不知詬病，而視爲適俗便身之具也。則莫如厲之以恥而止之，以漸。夫天下風氣之所成，恆在仕宦衣冠之地。欲民之改舊習，而不先於其所慕效，未有能改者也。誠宜奏定條例，凡京外大小文武各官嗜洋煙者，勒致仕。不改則永不起用。每屆京察及大計，書之於考，爲課殿最之準的。其各官幕友、各局紳董及書吏等犯者，輒黜之，不黜而舉發，坐其官以降級處分。凡士子之應州縣試者，責廩生保之。始許投考。諸生之應科舉者，令學官察犯者停考，能改者錄之。有司巡行閭里，見有設館誘

人與嗜煙者。枷示於市。屢犯者屢枷示焉。凡此皆所以示民恥辱之端。使之知至可賤惡者。莫洋煙若也。況人情所憚。在妨其進取之路。而阻其衣食之源。苟非甚不肖者。孰不速改。夫所行至約。而處之甚寬。使民自漸摩。被濯而改其習。天下少一嗜煙之人。卽多一有用之人。天下少一購煙之費。卽少一販煙之利。彼洋人將爽然自退。卽中國種罌粟之區。亦且漸化爲黍稷桑麻之地矣。抑又思洋煙之入口者。雖暫難明禁。不妨援西國重權煙酒之例。酌加十倍稅釐。非特可濟要餉。且使民憚其價之昂。則嗜之者漸減。是又不禁之禁也。至於洋人

傳教載在和約中國既有保護之條矣然彼所謂天主教者慣以微利啗我愚氓一入彀中卽爲之致死而不悔教士動輒干預訟事偏護教民挾制州縣而應之者或失之亢激則彼駛兵船以肆恫喝於是自疆吏以逮州縣凡事牽涉教堂者莫不曲意遷就苟求無事而止民知未入教者受教民之侮而無所控告一入教則恣橫而莫之能制自是趨之者如水赴壑矣然福成欲稍遏傳教之饑者非謂違約乃行約也約章謂安分傳教習教之人不得刻待禁阻是不安分者理難保護矣又謂如係中國律令之事仍由地方官照例懲辦是教民

犯法治之勿貸。非教士所能干與矣。今誠多選廉公有威明達大體之良有司。分布州縣。凡教民之倚勢犯法者。懲之。教士之妄問公事者。拒之。彼知入教不能求勝於平民。勢當稍沮。惟判斷公允。不違約。不徇法。宜有以折服其心。又當不動聲色。勿鼓眾民虛僞之氣。以激事變。但求政平訟理。且漸擴貧民生計。毋使爲饑寒所驅。則傳教者無權矣。若夫默抑教民進取之塗。似可稍參治嗜洋煙之法。而勿露其端倪。苟才智者不入其中。則天下事猶可爲也。夫洋教洋煙。驟入中國者。氣運之變也。斟酌情勢。默寓挽回之術者。君相之柄也。伏惟節下

出當大任力救時艱願及今日爲風俗人心計爲中國  
貧弱憂以此二事聞

天子密抒遠謨通行各省畫一辦理實萬世之福

伯兄撫屏云閱議鬱發灝氣孤行尤可寶者另有一  
種樸茂神味洋溢行閒古文家無此宏邁策論家無  
此精深

同治乙丑之夏科爾沁忠親王戰沒曹南曾文正公  
奉命督師北剿捻寇並張榜郡縣招致賢才余  
上此書於寶應舟次文正一見大加獎譽邀余徑入  
莫府辦事是時莫府諸賢爲劔州李榕申甫嘉興錢

應溥子密。黜程鴻詔伯舅。宣城屠楷晉卿。激浦向師。棣伯常。遵義黎庶昌。莼齋文正。語申甫曰。吾此行得一學人。他日當有造就。又謂余曰。子文長於論事。年少加功。可冀成一家言。卽與伯常莼齋同舟。互相切劘。可也。厥後余從公八年前後。出入莫府。共事者三十餘人。多一時賢俊。余頗得晨夕晤談。以擴見聞。充器識。皆文正提獎之力也。按求闕齋乙丑五月日記云。故友薛曉帆之子福成。遞條陳約萬餘言。閱畢嘉賞無已。余在莫府。嘗見文正手橐。近閱湖南刊本。歸入品藻一類。而訛爲伯兄撫屏之名。想由校者之誤。



月三  
恐後世攷據家或生疑義故並及之

辛卯九月自識

答友人論禁洋煙書

丁卯

福成白辱惠書以謂洋煙至今日勢所難禁且旣成風俗亦自不必禁斯言也僕甚訝之近有人傳足下亦染此者僕以足下績學砥行平日持議與此相反堅不之信姑就來書之旨一抒狂瞽之論幸垂諒焉大抵世風日降而人之嗜好日多古未聞煙可吸也卽旱煙一物至明季始有之吳梅村以爲妖見於綏寇紀略乃閱百餘年而有水煙矣未幾而洋煙入中國矣又未幾而中國膏腴之地徧種罌粟矣有南土西土廣土之名矣曩者一二巨公惄然憂世道之變欲厲其禁而大爲之防

未獲伸其志而顛沛以去。遂使世俗之論。謂洋煙終不可禁。當路諸君子。苟求無事而止。不知此事不禁。則養癰蓄蠱。生事之端。將有不勝言者。禁之而得其術。則轉移甚捷。實未嘗有一事。近世不惟決其防。又從而揚其波。以致洋藥之局。徧布城市。民之寶之。逾於穀帛。而其害將與宇宙相終始。且自古蠱民生。敗風俗之事。曰飲。曰博。曰妓。此三者。朝悔而夕改之耳。惟洋煙之癮。能改者百無一二。其性又足耗精血。損志氣。使君子不能勞心。使小人不能勞力。形神委頓。玩愒歲月。其下流無藉之貧民。因耗費不貲。往往寡廉鮮恥。以求足其欲。加以

煙燄薰灼。日夜銷鑠。此心則其心體因之以壞。五十年來。洋人布此鴆毒於中國。殺人之身。復殺人之心。其害過於洪水猛獸遠甚。今天下之日趨於洋煙者。如水之源。源東向而無窮期也。此其故由於上不之禁。上不之禁。則民不以爲詬病。而轉視爲適俗怡情之具。不及百年。勢將胥天下而入之矣。然而持不禁之說者。且以爲海內之廣。勢不能人人而禁之。禁之不絕。適以擾民。不如毋禁。噫。此所謂慮趾之顛。而不敢縱步焉者也。夫國家立一法。豈必遽效於旦夕閒哉。盜賊之必誅也。殺人之必死也。此千古治天下之常法也。然非堯舜之世。則

不能使天下無盜賊。無殺人之事。夫自古治天下者。不  
因之而廢其治盜賊與殺人之法也。而盜賊與殺人之  
人。卒以此而不比肩接跡於天下。然則洋煙之熄。亦在  
上之行其法耳。今計天下之財。耗於洋煙者。每歲不下  
數千萬。以數千萬之銀。易無限之灰燼。此如漏卮之不  
可不塞也。然塞之之功。不必先與洋人校。而當自中國  
始。邇年以來。煙之來自外洋者半。其出於中國者亦半。  
僕謂在上者。宜飭州縣嚴禁。民不得種罌粟。違者責里  
長拔之。仍罰其田主與里長畝米各若干石。里長舉發  
而先拔者。卽以罰田主之米畀之。如是則民已難牟厚

利而轉有所失。而治其源者。尤在絕人之嗜。嗜之無人。彼之煙自無所售。而種者益寡。卽來者亦寡矣。且今之人嗜洋煙者。非其本性。弊在不相詬病。而視爲適俗怡情之具也。是當厲之以恥。而止之以漸。夫民之耳目所慕效。大率在榮富之區。與秀良之士。昔日洋煙之盛。風氣皆由此而開。爲今之計。宜由大吏舉屬官之嗜煙者。劾令致仕。每屆大計。書之於考。以爲用舍。其各官幕友。各局紳董及書吏等。犯者輒黜之。凡士子之應州縣試者。責廩生保之。始許投考。諸生之應科舉者。令各學官察犯者停考。閭里中有嗜煙不戒者。里長籍其名於官。

以不清白論其尤無賴者執之徇於市凡此皆所以示民恥辱之端也苟非甚不肖者孰不速改夫法必煩苛急迫以駭民耳目勿禁可也今所行至約而處之甚寬使民自漸摩洗濯而去其習其效非可振契致者哉蓋今日洋煙之熾在上之不禁耳上之不禁由下持不禁之議者多耳僕不敏不敢隨聲附和足下儻有以教之幸甚

飭州縣禁種罌粟邇來左文襄公及相國朝邑閻公多持此論然其本原尤在絕人之嗜嗜之無人則雖不禁而民自不種若禁民嗜煙一層尙無把握而先

禁種罌粟是適爲洋藥驅除者也。轉不如暫弛此禁。猶可使財不外溢。觀於近年土藥日多。而印度洋藥箱之進口者漸減。中國銀之少漏入外洋者。每歲約千餘萬兩之多。蓋印度近來多種茶葉。以奪華人之利。而洋人亦謂中國多種罌粟。以奪印人之利。是以中國總以禁絕民之嗜煙爲要義。若明知驟難禁絕。不得已而出此弛禁種罌粟之下策。亦事勢之無可如何者也。辛卯九月自識



答友人書 乙亥

薛福成白。辱惠書。知吾兄近攻輿地之學。欲攷證塞外形勢山川地名沿革。勒爲一書。以蘄達之於用。甚盛甚盛。

國朝諸老爲此學者。如嘉定錢大昕。辛楣。錢塘龔自珍。拱祚。平定張穆。石舟邵陽魏源。默深。光澤何秋濤。願船。皆各有纂述。邇者李員外鳳苞。方典簿愷。奉曾文正公命。方箸地球圖說。彼二子者。皆以絕人之資。覃精竭能。博稽古籍。復參以今所聞見。他日成書。必斐然可觀。足下志力勤敏。或可與二子驂靳爭先。幸努力爲之。毋怠。

承詢近日洋務雲南一案漸有端倪英國公使威妥瑪在京師斷斷相爭百方恫喝固已變詐多端矣然以中外全力勉與枝梧猶可以蕲厥事不佞所鯁鯁過慮者滇事雖歲而四方之釁正未艾也方今俄人西踞伊犁東割黑龍江以北包絡外盟蒙古興安嶺繚互二萬里周匝三垂蓄銳觀釁法人蠶食越南取其東京以爲外府撤我滇粵之藩籬英人由印度規緬甸盡削其濱海膏腴地以闕我雲南西鄙日本雖自臺灣旋師而睨隙思逞今又有事朝鮮矣朝鮮固中國之外蔽也夫以我疆圉如是之廣而四與寇鄰譬諸厝火積薪廩然不可

終日烏虜。中國不圖自強。何以善其後。夫今日中國之政事。非成例不能行也。人才非資格不能進也。士大夫方敝敝焉爲無益之學。以耗其日力。所習非所用。所用非所習。一聞非常之議。則羣賊以爲狂。拘攣粉飾。靡有所屈。而彼諸國則法簡令嚴。其決機趨事。如鷺鳥之發。如是而外國日強。中國日弱。非偶然也。皆其所自爲也。今雖賢王勛臣。內外夾輔。僅能補苴撐持。一二十年後。吾輩恐未得高枕而臥也。來書又謂今之自強。不過摹仿他人之強。誇耀他人之強。與自字義相反。允矣。然使因惡他人之強。而遂不願自強。此又因噎廢食。諱疾忌

醫之見也。今有數人並駕於通衢。一人行百里未息。一人望塵追逐。僅至乎中道。一人甚他人之我先。不屑碌碌隨人後。終不離故地一步。夫其僅至乎中道者。誠宜以不能爭先爲恥。然猶愈於跬步未移。而自以爲高者也。開闢之初。人與萬物偕生。所需於世者蓋寡。其後不能無以自養。不能不相往來。卽不能無爭鬪。聖人者出。於是有耒耨之教。有舟楫之利。有弧矢之威。迄於今造化之機。日洩而泰西諸國之人。研之愈精。於是有農織之機器。有火輪之舟車。有銅鐵之槍礮。時勢之相推移。雖聖人莫之能違。夫今之不能不用機器輪船槍礮。猶

神農氏之不能不制耒耨黃帝氏之不能不作舟楫弧矢也。謂神農黃帝於耒耨舟楫弧矢之外無治天下之要道則不可。必謂併耒耨舟楫弧矢而廢之則惑矣。嘗謂中國人民物產風俗甲於地球諸國若能發憤自強原可操鞭笞八荒之具。弊在不能刪成例以修政。破資格以求才。士大夫不肯捐除故見。務爲有用之學。其聰明才傑之士又往往諱言洋務。僅使一二當事者區區於輪船槍礮。慕效西人。此猶見人之行百里而勞神憊形以隨之。不能具輕車。購駿馬。以騁長途而遐矚千里也。大抵天道數百年小變。數千年大變。自堯舜至今世。

益遠變益甚吾輩讀書致用不可復爲一切成說所拘如能會通其理則幾矣足下開敏善悟嚮不錮於俗學者故略抒所懷以相質證如有所見幸以教我冬寒惟珍衛不宣

上李伯相論與英使議約事宜書

丙子

宮太傅中堂鈞座。昨聞梅輝立翻悔前言。毅然由煙臺南下。其得步進步。狡獪叵測情狀。昭然若揭。竊思自古兩國相持。必先審彼己情勢。情勢瞭然。而後應敵之方裕如矣。方今英之富強。固非中國所能敵。而論天時地勢。英必不願啓釁於中國者。何也。英雖主盟西土。非一日。然自俄德之交合。英人惴惴自顧。常有慮其吞噬歐洲之意。一旦有事中華。俄人必乘閒長驅以闕印度。德人必興兵侵併旁近小國。以逼法蘭西。則英之唇齒亡矣。此固英之君臣所四顧躊躇者也。近聞土耳其國王

爲其臣民所廢。俄人意在用兵。而英人不敢漠視。香港兵船已有調歸之信。雖未必卽確。然其不輕用兵之意。則已有明徵。且威妥瑪在都商辦滇案。始以八條所允。旣鑒其欲。未嘗不漸就範圍。其旣允而旋翻者。梅輝立之意。蓋謂中國非劫之以勢。不能大獲所欲。故唆威使於成議之際。拂衣徑出。必待我再四挽回。然後示我以勉強應允之意。此正梅輝立之妙用也。今梅輝立已抵滬矣。度其來書。必故作決裂之語。以相恫喝。我之應之。不妨以距爲迎。先加駁斥。然後徐徐因勢利導。可以保其必不決裂。而轉圜必速。設令再從而將順之。羈縻之。



則彼又必幡然改轍而大肆厥求矣。何也？彼之所欲本無底止。彼之所謀亦初無定衡。彼但知事窮勢迫而後言和。其和必無遺憾也。彼但知中國不見其兵船。所許必未到極至之地也。是故敵兵之來不來不在所許之厚不厚。卽令所言必允。彼以爲可劫也。而兵至轉速。必復大索於所許之外。迨無可許而至決裂。則何如靳其所許。猶有可加於兵至之後。且使彼無奢望而收拾轉易乎？竊謂此時威使如有要挾。宜折之以理。勿稍遷就。則議和或易爲功。且威使在華數十年。近將歸國。設因此兵連禍結。牽掣大局。彼將內爲國主所尤。外爲商人

所怨實非其所深願。彼之本計。不過見可而進。知難而退。欲乘此時。迫脅中國。大得便利。以見好商人。爲歸老之榮耳。其水師兵船遊弋各埠。呼召十數號。不難立集。彼挾其伎倆。或欲一試而後快。固未可知。然則爲今之計。宜如何。曰。設備而已矣。洋人之性。以強弱爲是非。昔執事在上海。駕馭西洋兵將。有鞭撻龍蛇。視若嬰兒之風。以其時有淮軍五六萬人。戰勝攻取。先聲足以懾之也。同治九年。天津之案。法國兵船數號來泊。法使羅淑亞意氣驟厲。急索天津守令之頭。迨聞執事率兵數萬。由陝東行。則驕氣爲之頓殺。故設防所以定和局也。或

謂設防而觸其怒不如示不設防以速其和不知自古  
兩國相持備愈嚴則和愈速形格勢禁理有必然誠宜  
密速調兵節節布置俾人心固而聲援厚隱然有虎豹  
在山之威敵船一到飭我軍嚴兵以待斯時議和其詘  
伸損益之數自與無備者迥不侔矣謹將緊要事宜開  
列於後其中有宜急籌者有豫擬而不妨緩行者有姑  
存此說以鈐制敵人者伏惟恕其愚陋而採擇焉一勁  
旅宜調也議者或謂洋兵精悍中國之兵十不當一則  
調兵與不調同不知調兵而謂必勝者非也調兵而蓄  
銳勿動藉以張軍聲固民志彼之要挾亦當稍減此必

然之理也。且洋兵恃其船礮最利攻堅。若戰於曠野。豈能操必勝之券。昔英軍法軍助剿粵賊。屢挫衄而亡其將矣。淮軍以槍礮剿流寇。不甚得力。至用長牆圍制而始滅之。蓋野戰不專尙火攻也。今誠厚集兵力。自大沽接於津郡。自津郡接於通州。分段設營。萬一用武。則大沽之勢不孤。而迎敵之兵相續。彼涉海遠來。兵數不多。且無後繼。是已居可勝不可挫之勢。聞我兵力旣厚。則心孤而意怯矣。直隸自周盛傳一軍以外。各鎮練軍抽調七成隊伍。可得五千人。此外河南宋慶一軍。剿捻剿回百戰以成健旅。今聞有遣撤之議。惜小費而棄遠圖。

甚非計也。亟宜咨請暫停遣撤山西樹字六營。久經訓練。此二軍者。似須奏請。

諭旨作爲河南山西所遺拱衛畿甸之師。其月餉仍由兩省源源運給。濟甯銘軍全部萬人。亦宜飛調北來。如此則兵力稍厚。不至爲狡寇所乘矣。一餉項宜裕也。曩者西師遠邁。特發部帑二百萬兩。分作四批運解。所以重邊防。勵軍心也。今若京畿有警。則腹心之患。百倍新疆。似宜奏請。

朝廷權其輕重。暫緩批解。以觀形勢。如英事就緒。固當陸續解往。以符原議。否則宜移緩就急。以顧根本。揆諸

左相公忠體國之心當必謂然又西征軍數洋人莫測其眾寡且知其久練戰事萬一海疆有急似可奏請明降

諭旨俾左相盡率所部剋期東指仍密屬按兵勿動以待消息洋人一聞此音慮中國之無意於和也則求成必速而西軍不至掣動矣此亦虛實相濟之權伐謀之先幾也一密告各省設防也夫京師者天下之首也宜以全力護之沿海沿江各行省者天下之支體也宜各自以其兵力守之然以中國海疆之廣洋人船礮之捷且利又無鐵甲船鐵礮臺以禦之其不能處處設守也

明矣。今宜令各省酌量兵力，擇要設防，力所不逮者，准令官民遷避，讓以空城。彼航海遠來，人數無多，不敢深入腹地，所占不過一二城。又與吾民齟齬，動多疑懼，夫耗兵費以守空城，猶獲石田也。而各口貿易爲之停罷，則彼所損甚鉅，久必廢然退矣。昔年海疆有事，必欲處處設守，一城偶失，先自震驚，以至張皇失措，受制洋人，由不知此術故耳。一團練宜倡也。英人若僅以兵船數號來泊，固無事於團練。萬一志在必戰，調兵不敷，堵禦則號召團勇，其急務矣。往者粵寇之變，各省團練雖或奮績一時，終以潰散不振。而今謂其可用者何也？蓋粵

寇人眾而勢盛利攻散不利攻整洋人兵少而器精利  
攻堅不利攻散彼團勇散居鄉里攻不勝攻以洋人之  
所嚮無前而粵東三元里之役大爲團練所困殆不過  
以多制少以散制整耳咸豐三年天津縣令謝子澄號  
召團眾與獵梟槍手摧折粵寇十萬之眾此又團練可  
用之明證誠令密爲布置數萬之眾一呼可集可以廣  
張疑軍出奇掩襲亦救急之一大助也一滇案本末宜  
布告各國使臣也中國於馬嘉里一案特發重臣爲之  
輯兇爲之議卹可謂鄭重周至乃威使播弄其間欲坐  
我以指使之名中國若不亟自剖白方且受英國君臣



之怨方且被各國商民之謗方且爲地球萬國所不右  
今宜厯敘滇案顛末揭明曲直之理且威使自辦滇案  
以來始則多方禁阻不許詳告各使繼則百端要挾不  
使及時議結宜將此兩層反覆詳述咨明各國駐京公  
使請其秉公評論仍密飭江海關馮道轉屬稅務司徧  
刻各國各埠新聞紙中作爲中國商民之言彼都議院  
非無公論久必有據理以譏威使者如此則所費無幾  
而轉移大局之機已在其中或謂此法雖善恐威使因  
愧生怒愈激事端不知洋人之性剛則吐而柔則茹可  
以勢禁不可以情感以文文忠公之斷斷好辯而威使

欽服至今。氣足以折之也。誠能道其隱微。洞中肯綮。彼自畏其國人之譏彈。英之君臣必且憬然而自悟。或亦釜底抽薪之一術乎。一商務一條宜堅持也。威使所索八條。英使威妥瑪所索八條一滇案前後事宜由總署奏明請旨宣示。婉借之意先索觀摺底。再會商入奏。咨會各省。編發示諭。張貼各府廳州縣。一聽英使派員赴各處查看。所張示諭以兩年為期。一內地有關係英人。身家案件。由英使派員觀審。一滇省與英緬邊界商務。兩國派員妥議章程。一五年為期。由英派員駐寓重慶及雲南大理等府。稽查通商事宜。一補救通商大局一節。原有另議。其餘正子並交之議。另具節略聲明。一欽派使臣赴英。剋期啟行。所有宣明惋惜之意。之璽書。該使先查看底文。一償款由英使咨呈本國。作惟商務尤關緊要。尤其全力所注。六條補救通商大局一事。凡沿海沿湖沿江酌定各埠開作洋船往來口岸。訂明洋貨進口完稅。時正子並交。惟宜昌一口。剋

期開作通商馬頭總稅務司赫德又遞威使所索第六  
條內另議要端共有六條一洋貨入內地華洋一律完  
子口稅領稅單一買洋貨時在本口內完子稅概不重  
征一洋布在通商口岸通商省分概免抽釐一洋貨在  
通商口岸抽釐定不得過值百抽若干之章一出洋土  
貨准華洋一律請報單入內地購辦一通商各口設官  
信局歸總稅務司管理一設其餘似皆非其本意此次  
鑄銀官局歸總稅務司管理  
佛然出都故作決裂之勢蓋爲洋貨免釐一事而發也  
然彼不專就此事措辭者何也彼欲侵我自主之權於  
理既爲不順擅各國使臣應議之柄於情又爲不公且  
與滇案毫無關涉究屬節外生枝威使其自知之矣故  
忽允忽翻以布其勢旁敲側擊以紆其途其誣及疆臣  
吠及樞府怵我以所甚危也其請

覲見請提滇案逆料我所不能行也而要無非爲商務一端作引而不發之機欲使我自屈於無形甘心以釐稅全數相讓彼乃安坐而享其利吁可謂黠矣雖然釐稅一宗全允所請每歲所損於中國者將及一千萬兩淮軍西軍必從此而撤京餉協餉必從此而虧海防應辦諸務必從此而廢不數年而他案復興彼乘我之無備又議減洋稅矣斯時財匱力弱雖欲一戰不可得矣是故商務之說彼以全力爭我當以全力拒卽不得已而遂至用兵用兵不勝不過賠償兵費兵費少者數百萬多者千萬而止耳千萬之款取諸釐金一歲所入而

有餘猶愈於不戰而自困也。且以每歲千萬之正款可養勁兵十餘萬。誠如同治初年剿辦粵寇之時。聚精會神。賢才競奮。則何敵不可克。何功不可成哉。議者又謂失之釐金。可稍取償於洋藥。洋藥乃無源之水也。釐稅所收者百萬。而民財之隱耗已數千萬矣。其可恃以爲利乎。今威使既將八條作爲罷論。不妨舍此而別議。或酌添一二口岸。或另加可許者一二條。所損猶輕。倘彼必理前說。亦當告以中國關稅之輕。向爲地球各國所未有。今宜增至什二。以昭中外之一體。以補釐稅之不足。否則飭各海關道別議辦法。必令相當乃已。庶中國

利權猶保一二乎一請

觀見請提滇案並非威使本意也洋人所重者莫如利  
商務一節乃其全神所注外此二者蓋料我所不能行  
而故以此相攪耳我視之愈重彼索之愈急就令許之  
中國尙無大害洋人亦無大利是許之而轉足以止之  
或未可知若其意在必行則提案一節可由刑部照原  
供審理堅勿改移至岑中丞提京之說不妨告以大員  
並無過犯但可驛召至京與威使面質是非萬無提訊  
之理中國之例雖無罪細民不得妄加呵斥豈獨大員  
爲然至

觀見一節。同治十二年成例具在。誠令盛設儀仗。懾以天威。彼自讐伏之不暇。似無損於體制。但未可輕易允許。或留爲倉猝轉圜之地。或藉以塞他事之要求。是在斟酌於輕重之間。權衡於臨事之頃耳。一俄德兩國宜速遣使臣也。今日歐洲形勢。俄德鴟張於東北。英法虎視於西南。俄軍方下基發。窺印度。逼土耳其。英人岌岌自顧。幾有僂焉不終日之勢。其不能耦俱無猜也久矣。明知泰西諸國種類雖殊。而交涉中華。則仍聯爲一氣。牢不可破。然速遣俄德之使。收外助則不足。布疑陣則有餘。何則。俄德乘英之多事。出兵而議其後。則印度必

危土耳其必亡。歐東小國必斂袂而朝於俄德。大非英人之利也。誠早發使二國。彼恐俄德與中國之交驟合而軋已也。則顧忌多。顧忌多。必不敢有事於東方矣。或謂值此中外多故。士大夫必不願行。不知以天下之大。時艱之棘。豈無忠義才略之士。思得當以報者乎。彼畏蒞偷安者置之可也。以上八條。聊就所見。拉雜書之。妄蹈出位之愆。謹抒愚者之慮。是否有當。一二伏祈采擇。六月十九日。福成謹上。

丁稚璜宮保云。識微鑒遠。洞中機宜。其體國之忱。匡時之略。應機之敏。料敵之明。超越尋常。萬萬篇中。



尤深切著明處。直將威梅二人狡獪肺肝。雕鏤出之。當事者已采擇施行。決有成效可觀。

此書既上。適威妥瑪久駐煙臺。誓不北上。仍微露願與伯相定約之意。朝廷特命伯相馳往以示牢

籠。伯相奏調余隨行襄理。凡匝月而蕝事一切相機措注大略。與此書脗合者十之七八。蓋非必專用余言也。謀議之僉同。時勢之相迫。有欲不如此而不可得者。始知凡事皆有竅要。當局者設施次第。雖稍有先後異同。固百變而不離其宗耳。

自識

答某觀察書

辛巳

福成白辱惠書謂南洋論球案一摺多中窾要此大惑也南洋痛駁北洋之摺同議一事者無此體例蓋

朝廷但使議球案非使并議北洋之摺也其全疏逐段看去近似有理迨合前後文觀之則自相矛盾者甚多彼謂北洋支展之法日人未必不知知之必附俄與我爲難是其意在速結球案也既欲速結球案必如總理衙門所議以全予之而後可而彼又知改約不宜牽涉既不改約日人其聽我速結球案乎此等兩歧空議議如不議耳無論半年以來未見日人附俄與我爲難且

北洋之意蓋因總理衙門允許在先而改約實不可行。南島實不可收。又適值俄事未了。若不峻辭拒絕。恐於俄人之外多樹一敵。故欲於此數月內暫行支展之法。以羈縻之。舍此別無良策也。彼云北洋未將利害權衡輕重。則其意謂必許改約。必收南島矣。然其後段又有中國如獲石田等語。其結束辦法。竟與北洋相同。既隱襲北洋辦法。而其前之痛加翻駁。更無謂矣。此由中無定見。任意立說。而忘其自相矛盾也。洋務瞬息千變。不可執一而論。當琉球初廢時。中國欲與日。本理論。深以不得收場爲慮。蓋自揣無力用兵。又恐於顏面有損。故

前歲託格蘭忒調停無非爲收場起見乃日人飾辭延宕終無成議此我不欲支展而日人利於支展者也既而中國因俄事方殷陳師鞠旅有不憚用武之意聲勢稍張球案已閣置三年卽暫不理論亦無所損况總理衙門又適有願收南島與許內地通商之議若必速結勢難驟改成約無論球王不釋球祀難復徒爲日人分謗而仍未見收場且雖似有收場而不如無收場遠甚得此不毛之地棄之不可守之不易此其自遺後累而永無收場必更有甚於今日者日人乘俄約未定恫喝迫促求贖所欲此我利於支展而日人不願支展者也

今俄約既定。中國勢居上風。日本財匱兵寡。民心不靖。其不敢啟釁於我。無智愚皆知之。萬一啟釁。而其強弱與俄相較。奚啻霄壤。中國亦尙足制之。況中國積習。一旦無事。則上下泄沓成風。留此敵國外患。以爲修武備。購利器。儲人才之具。大局不爲無益。假令日人此時必欲改約。必令退出全球。然後以均霑一條與之。較之總理衙門原議。所得已多。非支展何以致此。若使不釋球王。不讓球地。則中國亦始終不許以改約。猶可保全內地之利。此其與徇總理衙門初議。自失內利。又冒不韙之名。守荒瘠之土。自致進退兩難。貽累無窮者。相去遠

矣。總理衙門不知此義。故始終辦理未愜人意。南洋更不知此義。其諛辭邪說最足搖惑人心。不得不辭而闢之。以當面談。維順時珍重不宣。

上李伯相論援救越南事宜書

癸未

宮太傅伯中堂鈞座。敝送旌麾。瞬逾一月。伏維禮祺康泰。永卜佳城。大事已終。渥膺

眷倚。曷任企慕。昨聞越南事急。

朝命督師往援。未審如何定議。竊思法越構釁。法使寶海已有分界保護之議。而法廷忽翻成約。決計濟師。我出使大臣來電。與寶海來言。皆謂一二宵小之謀。非其通國之公議。法廷亦必不肯以全力圖越。苟知中國志在必爭。自當返而變計。此固理勢之必然者。儻中國竟置勿理。彼一二宵小。必自鳴得計。益肆鴟張。我雖不願

決裂務存退讓彼且得步進步終迫我以不得不決裂之勢自莫如先示以不能退讓張我虛聲俾彼之議院猶豫而不敢定謀彼之紳商疑沮而不肯集餉未始非釜底抽薪之良法也然福成愚以爲當如前此鈞議薦劉軍門銘傳率萬餘人前往已足伐敵謀而壯聲威中堂宜早還北洋或暫駐南北洋適中扼要之地調兵選將兼籌全局

廟堂旣便於諮詢各使亦可來會議較之局於一隅偏主一事者相去遠矣

廷議或又以鈞座威望最隆方略最廣呼應最靈姑借



此一行以牽制法廷之議。冀如煙臺約事之速了。誠能一勞永逸。豈不甚善。惟既圖大舉。後難爲繼。究係孤注。設彼未遽就範。則曠日持久。驟難轉圜。亦非長計。此事關係至鉅。似宜爲

朝廷切實言之。不必稍避嫌疑也。一得之愚。謹陳大略如左。一請薦劉軍門。銘傳爲督辦也。劉軍門在諸將中。韜略優長。聲望夙著。惟退居有年。恐其無意出山。似宜密請

朝廷優以禮數。假以事權。馳往前敵。總統諸軍。相機援越。其智略氣概。必可瞽服遠人。所有分駐南北洋之銘

軍皆其舊部。若南北洋各撥十數營。尙於防務無損。萬一有警。不妨臨時補募。且我軍雖往救越。而法使駐京者自若也。法商在各埠通商者自若也。則並無決裂之形。南北洋各口。乃各國通商之公埠。法人必不遽圖侵犯。卽有戰事。亦僅在越地而已。夫以劉軍門之才。與銘軍之習戰。且得滇粵官軍爲之援應。而法兵不過一二千。又在山險箐密崎嶇之地。火器不甚得力。揆諸眾寡之勢。未必彼勝我負。法人心孤氣餒。當可設辭講解。似不至驟出於戰也。一規畫全局。不可惜鉅費也。中國徵兵遣將。本意實不在戰。然一動大眾。則弁勇之運送有

費糧械之轉移有費將士之犒賞與一切雜用有費或者以虛糜帑項而惜之不知所籌在天下大計得失之機有不可以數計者昔英人之救土耳其也廣調戰艦進泊黑海而俄約以成俄人議伊犁之約多遣師船屯駐海參崴等處迨和局既定然後徐退蓋凡兩國交涉虛實之機互相爲用欲求實事之無損不能不藉虛聲而欲播虛聲仍當課之實事以西人消息甚靈虛聲固無倖獲之理也且非特此也方今各國皆擲數千萬億之鉅費治火器造鐵艦習技巧無稍顧惜而究之實有戰事者或數十年不一觀然使因其不用而不爲則其

國必危且弱。而其終也。轉不能出乎戰。殆亦時勢使然。雖聖人不能違也。今如添調萬餘人。援越除正餉。因其原額。無庸重籌外。所有轉運賞犒及雜用各費。似可核定歲需若干。奏明由部撥款。毋使闕乏。若謂其本不出於戰而多此一舉。稍存顧惜之意。恐所失不僅什伯於此者已也。一兵輪船宜酌調也。此次中國出師。原不過廣張聲勢。而論聲勢之壯盛。兵輪一號。可抵陸軍一二營。兵輪雖遠涉重洋。用煤而外。尙無大費。若陸軍往返跋涉。其費不啻倍蓰。故多調陸軍。不若多調兵輪之費省而威壯也。雖中國兵輪尙單。各守其地。未能多調。

然兵輪本貴變動不居。涉厯風濤以資操練。乃足化呆著爲活著。今由船政派往廉瓊洋面巡防者。既有濟安飛雲兩船。此外如北洋之揚威超勇威遠鎮海四船。似尙可抽調一二。江南之靖遠澄慶登瀛洲測海威靖馭遠六船。尙可抽調二三。浙江之元凱超武兩船。尙可抽調其一。福建之伏波振威藝新福星揚武五船。尙可抽調其二。如此則兵輪已近十號。再輔以廣東善後局之小兵輪。遴派水師統將前往督率。與吳軍門全美會同操防。梭巡粵越洋面。在各省偶爾借撥。斷不因暫少一二船而有損防務。而越事之藉其聲勢。則可與萬人之

陸軍相等亦且相輔並行固事半功倍之策也至定遠鐵甲船本有三月來華之信似宜電催以免再有稽延國家不惜鉅帑購此利器正須及時而用不可失也一宜籌定駐營之地與進兵之路也今援越之兵除廣東雲南諸軍各由陸路出關外如再派大枝勁旅則陸路之艱阻與海道之便捷其勞逸相去奚啻十倍昔漢伏波將軍馬援南征交趾由合浦緣海而進大功以成厥後水軍入交皆用此道誠以廉州北海一口形勢穩便海道順利駛往越南各海口皆不過一二日海程必以此爲會師之地也竊謂宜就廉州北海擇地駐軍定爲

老營輔以水師聲威益壯然後相機進止必有不戰屈人之威至由海入越之塗當以海防之桃山一口爲最扼要然有法軍駐泊恐啟釁端此外則有安陽海口塗山海口多漁海口太平海口望瀛海口神符海口皆係北圻要隘處處可以登岸是宜臨時審酌非可豫爲遙度也一強敵之隱情宜審明也方今法國議院分黨角勝莫適爲主其持議欲吞全越與意在適可而止者眾寡之數本無懸殊特彼素料中國不尙遠略姑爲此舉以相嘗試不過一二桀黠無賴不顧大局者主之然通國上下隱謀仍在養精蓄銳報德之仇備德之患而不

願敝其力於遠方。若須多用兵餉，或能發而不能收，則彼計所決不肯爲。且法國地居四戰，與英俄德意奧諸強國境壤相接，其水陸兵額雖多，各守要地，勢難撤調。卽調兵赴越，而遠涉重洋四五萬里，其餉費必加十倍。近聞法廷定議濟師，以千五百人爲限，其餉以五百萬佛郎爲限。法非不富，且強，而兵餉之數僅能如此者，非惟勢有所格，亦見其上下之情徘徊瞻顧，未肯爲孤注之一擲也。審乎此，則啟釁之事斷可無慮矣。且法廷雖撤寶海，而又未派員來代，或者故留一活著，徐觀形勢，再定進止，固未可知。儻中國能出其不意，命將出師，自



足閒執法廷主議者之口而隱戢其欲逞之心彼議院因疑生沮或且漸改成說而千五百人可不盡來卽從此黷武之議亦益紕此其機括甚微而轉移甚捷也一中國如發軍援越宜籌所以措辭也今者法軍侵逼越南自稱並無與中國爲難之意不過欲使越人踐甲戌舊約耳其言近似有理中國欲正辭以折之則近於挑釁欲順受而聽之則終非長計是宜告法人曰越南本中國屬邦私與法盟未告中國又擅立虧損中國之約故將進兵問之斷無與法爲難之意此一說也或正告法人曰北圻諸省中國頻年勞師旅斬荆棘冒霜露所

代爲戡定者。今越南不能自理。以致土寇縱橫。中國不忍其民之塗炭。仍以兵力撫定其地。俟道路疏通。與各國徐議通商。自無不可。此又一說也。二說者審時度勢。參酌用之。而爲之將帥者。尤貴有能戰之才。可戰之具。而不輕於一試。蓋中外文告。旣無與法開釁之辭。萬一偶有戰事。猶可以將士械鬪爲解。雖劇費口舌。似終無損兩國之好也。一導越南聯絡英德諸國也。近聞總理衙門欲仿朝鮮之事。導越南與各國立約通商。此雖要著。然已稍後而失其時。蓋越南之經營此事。如在二十年前。僅足比今日之朝鮮。朝鮮如再不與各國立約。俟

至二十年後亦當如今日之越南固由時地不侔難可  
執一而論今法已踞越之南圻取越之東京翦越之南  
定勢如破竹危如累卵中國卽爲代約各國各國知不  
得已而求之未必喜出望外而法人亦必多方阻難或  
且市恩各國以遂其包攬之私是其事之難辦當數倍  
於朝鮮卽幸而有成恐所議條約必不能如朝鮮之多  
獲便利也雖然知其無大效而爲之猶愈於不爲且德  
爲法之仇敵而英人注意滇邊通商又忌法之得越者  
也中國果能代爲介紹俾英德各國與越南立約通商  
則法人無所挾以歆動各國或再導越南使臣歷聘英

德隱動法人顧憚之心。卽遇各國有所評斷。亦必歸曲於法。法人恐無益於實。而有損於名。則其議院之謀自變矣。以上數端。皆就時勢所宜。稍抒臆說。至於撫用劉永福。以聯指臂。電商出使大臣。以資辯論。安籌商務。以操利柄而定和局。客冬已詳議之。蓋事勢至迫。措注愈艱。於此而欲求萬全。轉恐終無一全。祇可權利害之重。輕而決擇行之耳。伏求中堂主持至計。勿稍顧慮。大局幸甚。恭敏禮祺。伏惟崇鑒。四月初二日。福成謹上。

與張副都御史書

癸未

幼樵先生中丞閣下前布一函諒登記室近聞越南事急合肥伯相奉督師援越之

命法廷於四月初旬遣使赴越將逼勒越南王畫諾以東京永歸法兵踞守並聲明法有保守全越之權越之政務稅務均歸管轄果爾則越南亡矣法使五月內必可到越彼時再協以兵威越南孱弱必懼而聽命越既受盟於彼中國更進退失據祇可將援軍撤回尙復何說之辭愚計以爲此時伯相固宜暫駐滬上以示可南可北可和可戰可進可退之勢而所調之銘軍宜速集

輪船陸續運往廉州。迅於法使未到之先，往張聲援。則越南君臣之氣自壯。劉永福等之守益堅。既足牽制於無形。法使雖到，兇鋒自可稍斂。或且徐示轉圜。此越南存亡呼吸之機，不容頃刻緩也。至此事之究竟辦法，與伯相顧慮大局之苦衷，請爲執事略陳之。蓋今日中國於法越之事，不外三端。曰退讓，曰決裂，曰先作勢欲戰而以和爲歸宿之地。退讓一說，則謂法越甲戌舊約已閱十年，越人自入法之彀中，中國豈能代爲翻悔？旣恐橫挑強敵，致開大釁，惟有斂兵入關，置越南於不顧。然無論半途輟示，弱損威，大傷國體。從此各國生心，藩

離漸撤。琉球諸案將不可復議。朝鮮諸國將不可復保。臺灣各島將不可復安。中外交涉各事將不可復言矣。法人既得越南。覬我滇粵礦廠之饒。與通商之利。必且藉端生事。乘閒侵占。或稱兵內犯。要以割地通商。斯時欲力圖自強。而事已不可爲矣。是退讓之說。雖苟求省事於一時。恐十數年後。大局不堪設想也。決裂一說。則以法人之無義。布告各國。大舉援越。直趨東京。夫以勁旅數萬。與法兵千餘。戰於越境。未必不勝。法人初意。雖不欲啟釁。然事勢所迫。難保不以兵船分擾南北洋。爲牽制要挾之計。是中國代越受兵也。況戰艦火器。尙非

其敵難操勝算此決裂之說中外當事所以躊躇審顧未肯輕於一擲也至先示欲戰後歸於和之說福成去冬議之已詳今舍此亦別無良策然必餌以通商而後彼心稍慰否則彼所積年歆慕之事而我力拒之彼知取越然後可以通滇通滇然後可乘機進逼徐開商埠是堅其滅越之志也亦必許以分界而後彼氣稍平否則彼所力征經營之地而我欲爭以口舌俾引師而退仍以越南專屬中國必非法人之所甘心是啓其窮兵之計也竊思越南全境除京圻有富春廣治廣南三省外南圻僅存三省其六省已爲法人所踞惟北圻境壤



至有十六省之多。是北圻實得越地四分之三。前者寶海分界保護之議。欲以富良江爲界。拙議復稍就其說而變通之。旋聞滇粵諸帥必欲以北圻盡歸中國保護。僅以南圻三省歸法保護。此必不可得之數也。通商一事。曾侯之論。謂大有益於邊防。與拙議大旨相同。近年江海各口多收洋稅。煙台條約所增口岸。未見流弊。皆其明驗。滇粵諸帥復力持不可。充是二者。則法人無可和之理。其勢必出於戰。然中外共知釁端未可輕啟。不能不稍務持重。而法人乃行之以堅決。濟之以神速。和戰互用。誘脇越王。數月之間。法越必有成局。越旣屬法。

中國卽不能過問。是其迹近於決裂。其究歸於退讓而已矣。竊窺伯相微愾。蓋恐赴粵之後。滇粵諸軍。素非所轄。未必盡聽指揮。將欲與法講解。而通商法界二事。中外之見不合。卽法越之釁難弭。如決裂之後。法兵窺我南北洋。而撤軍回援。固形狼狽。若業旣大舉。仍歸退讓。則不如徑置勿理。暫免大損聲威。此伯相長慮卻顧之苦衷也。福成愚以爲此時。舍迅速進兵之外。別無長策。伯相則不妨暫駐滬上。以示居中策應之勢。至其歸宿。則通商分界之說。終不能廢。法人雖自翻前議。今并置此不講。而必欲盡取越南。或者故作進步。以爲異日講

解之地萬一彼再理前說似不宜堅拒以絕法人之望  
滇粵兩省卽有異辭似宜由

朝廷裁定或聽伯相主議而後兩國之約可成也大抵  
中外多事之際統兵者每恥言和奉使者每不欲戰謀  
疆場者不輕開釁任地方者不願通商彼求各當其職  
其道不相爲謀而相爲用其說可以兼聽而難兩全是  
在統籌全局者折衷而用之耳又如滇督岑公雖號知  
兵然覈其前後奏議旣稱劉永福盜賊之餘斷不可用  
又循唐方伯之議謂稍資永福以餉械卽可保守越南  
旣陳明滇軍不宜久戍越地又謂北圻斷不可割必得

全境而代爲保護。前後措辭。不能相應。蓋由滇中僻遠。消息最遲。生平與洋人交涉不多。故於敵情研之未熟。以致胸無定見。則雖有籌度。未可據爲確論。是又在朝廷之發縱指示矣。時艱日棘。輒復發其狂瞽之論。春闈近甫蒞事。盡勞可念。惟順時珍重。不宜福成頓首。

代李伯相答朝鮮國相李裕元書

丙子

橘山尊兄太師閣下。客臘裁復寸箋。稍摠積愆。頃永平  
游太守轉送五月十五日惠翰。引義謙而見推過當。非  
所敢任。復荷雅贐。毀奉拜登之餘。愧謝愧謝。敬審起居  
曼福。動靜多豫。內贊密勿。外敦鄰好。蓋勞可念。日本與  
貴國介在東表。前以邊境小忿。惻然有示武之意。嗣聞  
消釋嫌疑。言歸於好。信使往還。息事靖民。爲之一慰。僕  
忝領畿輔。與貴國疆宇相望。且思歷朝交誼之厚。解紛  
排難。乃分之宜。西洋英俄諸國。專務通商。地球以內。幾  
無不到。茲日本既導先路。諸國或思步其後塵。彼亦明

知貴國物產非豐洋貨銷路不暢而歐洲風氣每以多  
開口岸互相矜耀或雖得請以去旋因貿易無益而遲  
遲不至者亦閒有之此中操縱機括諒老成謀國者必  
能措注咸宜也僕力小任重春夏以來雨澤愆期頃已  
疊霈甘霖三農徧慰似可轉歉爲豐附致菲儀十六種  
稍答盛誼涼風浥至順時節宣書不盡意某頓首

代李伯相再答朝鮮國相李裕元書

戊寅

橘山尊兄太師閣下。前由永平游太守轉送丁丑十月望日惠書。嘉貺益興。感謝曷已。祇以郵程之便。闕然未報。歲月如馳。寒燠忽更。比惟勛猷雲蔚。餐衛咸宜。撫綏羣黎。慎固四封。盡勤碩畫。至爲企念。日本與貴國議約修好。將及三年。萊館互市。未見繁盛。商民錯處。能否相安。彼國自平秀吉以來。恃其詐力。囂然不靖。近者西鄉隆盛弄兵潢池。不戢自焚。彼君臣鑒於國小多難。或不敢復勤遠略。往歲中國駐倭公使何侍講前赴東洋。僕以貴國之事。屬其留意體察。隨時調停。旋接何侍講來

書日本近以俄人有事四方貪得無厭怒然如猛虎之  
在臥榻之旁其於貴國既無惡意似欲聯爲輔車引爲  
唇齒頗疑貴國不肯傾誠相待僕揆度大勢泰西英美  
各邦相距尙遠志在通商無利人土地之心俄跨有三  
洲土壤實與我東北邊界毘連又時以蠶食鯨吞爲事  
貴國與日本濱臨東海俄國兵船游弋窺伺勢所難免  
譬猶虞虢備晉韓魏畏秦其端不始於今日也前聞日  
本欲在貴國咸鏡道之元山津開口通商俄人陰沮其  
議謂他日設有戰事恐於日本商務有礙英人請日本  
介紹通商俄復沮之若果屬實其意欲使貴國孤立無



拔一旦發難。可以廓然無所牽制。識時之彥。用爲隱憂。昔蜀先主猱亭之敗。怨吳甚深。而諸葛武侯生平措注。以和吳伐魏爲上策。唐德宗有宿憾於回紇。李鄴侯勸以釋忿尋盟。而吐蕃之勢頓衰。蓋命世英雄。蠲細故而擴遠圖。往往如此。邇聞俄國與土耳其和議已成。西事方葳。將圖東略。執事老於謀國。徹桑迫陰之計。其在斯時乎。僕以東土屏障中原。又千里神交。氣誼相孚。不得不一攄肺腑之談。近今貴國廟謨若何。鄰交若何。固未能知其詳也。僕忝居高位。無裨時艱。所幸入夏以來。雨暘時若。此閒及晉豫各屬年穀順成。億兆生靈。有嘯枯

回生之望附呈菲儀十六種聊答盛誼關山簞阻延企  
爲勞惟順時自愛不宣某頓首

代李伯相三答朝鮮國相李裕元書 己卯

橘山尊兄太師閣下。正月杪裁復寸函。旋於二月間。接到客臘望日惠書。反覆於邦交一事。推究得失。剖晰情勢。忠謨碩畫。傾佩無涯。比諗頤養脩齡。平章大政。保疆禦侮。措注咸宜。至爲企頌。承示日本與貴國交涉各節。倭人性情桀驁貪狡。爲得步進步之計。貴國隨時應付。正自不易。客歲駐倭公使何侍講來書。屢稱倭人情爲介紹。願與貴國誠心和好。兩無虞詐。鄙人思自古交鄰之道。因應得其宜。則仇敵可爲外援。因應未得其宜。則外援可爲仇敵。倭人之言。雖未必由中。尙冀迎幾善導。

杜彼爭端永相輯睦是以曾寓書奉勸勿先示以猜嫌致令藉爲口實也近察日本行事乖謬居心叵測亟宜中爲之防有不能不密陳梗概者日本比年以來宗尙西法營造百端自謂已得富强之術然因此致庫藏空虛國債纍纍不得不有事四方冀拓雄圖以償所費其疆宇相望之處北則貴國南則中國之臺灣尤所注意琉球乃數百年舊國並未開罪於日本今春忽發兵船劫廢其王吞其疆土其與中國與貴國難保將來不伺隙以逞中國兵力餉力十倍日本自忖可以制之惟嘗代貴國審度躊躇似宜及此時密修武備籌餉練兵慎

固封守。仍當不動聲色。善爲牢籠。凡交涉事宜。恪守條約。勿予以可乘之端。一旦有事。則彼曲我直。勝負攸分。第思貴國向稱右文之邦。財力非甚充裕。卽令迅圖整頓。非旦夕所能見功。近聞日本派鳳翔日進兩戰艦。久駐釜山浦外。操演巨礮。不知何意。設有反覆。中國卽竭力相助。而道里遼遠。終恐緩不及事。尤可慮者。日本廣聘西人教練水陸兵法。其船礮之堅利。雖萬不逮西人。恐貴國尙難與相敵。況日本諂事泰西諸國。未嘗不思藉其勢力。侵侮鄰邦。往歲西人欲往貴國通商。雖見拒而去。其意終未釋然。萬一日本陰結英法美諸邦。誘以

開埠之利。抑或北與俄羅斯句合。導以拓土之謀。則貴國勢成孤注。隱憂方大。中國識時務者。僉議以爲與其援救於事後。不如代籌於事前。夫論息事靖人之道。果能始終閉關自守。豈不甚善。無如西人恃其慄銳。地球諸國。無不往來。實開關以來。未有之奇局。自然之氣運。非人力所能禁遏。貴國旣不得已。而與日本立約通商。各國必從而生心。日本轉若視爲奇貨。爲今之計。似宜用以敵制敵之策。次第與泰西各國立約。藉以牽制日本。彼日本恃其詐力。以鯨吞蠶食爲謀。廢滅琉球一事。顯露端倪。貴國固不可無以備之。然日本之所畏服者。

西人也。以朝鮮之力制日本。或虞其不足以統與西人通商。制日本則綽乎有餘。泰西通例。向不得無故奪滅人國。蓋各國互峙爭雄。而公法行乎其間。去歲土耳其爲俄所伐。勢幾岌岌。迨英奧諸國出而爭論。俄始斂兵而退。向使土國孤立無援。俄人已獨享其利矣。又歐洲之比利時丹馬。皆極小之國。自與各國立約。遂無敢妄肆侵陵者。此皆強弱相維之明證也。且越國鄙遠。古人所難。西洋英德法美諸邦。距貴國數萬里。本無他求。其志不過欲通商耳。保護過境船隻耳。至俄國所據之庫頁島。綏芬河。圖們江等處。皆與貴國接壤。形勢相逼。若

貴國先與英德法美交通不但牽制日本並可杜俄大之窺伺而俄亦必遣使通好矣誠及此時幡然改圖量爲變通不必別開口岸但就日本通商之處多萃數國商人其所分者日本之貿易於貴國無甚出入若定其關稅則餉項不無少裨熟其商情則軍火不難購辦隨時派員分往有約之國通聘問聯情誼平日旣休戚相關倘遇一國有侵占無禮之事儘可邀集有約各國公議其非鳴鼓而攻庶日本不致悍然無忌貴國亦宜於交接遠人之道逐事講求務使剛柔得中操縱悉協則所以鈐制日本之術莫善於此卽所以備禦俄人之策



亦莫先於此矣。近日各國公使在我總理衙門。屢以貴國商務爲言。因思貴國政教禁令。悉由自主。此等大事。豈我輩所可干預。惟是中國與貴國誼同一家。又爲我東三省屏蔽。奚啻唇齒相依。貴國之憂。卽中國之憂也。所以不憚越俎代謀。直抒衷曲。望卽轉呈貴國王察核。廣集廷臣。深思遠慮。密議可否。如以鄙言爲不謬。希先示覆大略。我總理衙門亦久欲以此意相達。俟各使議及之時。或可相機措詞。徐示以轉圜之意。從前泰西各國乘中國多故。併力要挾。立約之時。不以玉帛而以兵戎。所以行之旣久。掣肘頗多。想亦遠近所稔知。貴國若

於無事時許以立約。彼喜出望外。自不知格外要求。如販賣鴉片煙傳教內地諸大弊。懸爲厲禁。彼必無辭。做處如有所見。亦當隨時參酌一二。以盡忠告之義。總期於大局無所虧損。夫政貴因時。治期可久。知己知彼。利害宜權用。閒用謀。兵家所尙。惟執事實圖利之緣。迭奉來函。諄諄於交鄰保境之道。用敢不憚醜縷。密布腹心。復候起居。書不盡意。某頓首。

趙桐生云。三書皆包舉閎遠。絕有關繫。洵爲經世不刊之文。